

# UNIMAS LATIH PENGAWAL JADI POLIS BANTUAN

18 March 2016

- The Borneo Post Online

KOTA SAMARAHAN: Bahagian Keselamatan Universiti Malaysia Sarawak (UNIMAS) dalam proses melatih kesemua 145 pengawal keselamatan menjadi ahli Polis Bantuan untuk mempertingkatkan lagi keselamatan dan kesejahteraan di kampusnya.

Naib Canselor UNIMAS Profesor Datuk Dr Mohd Kadim Suaidi berkata, dengan 35 pengawal yang telah menjalani latihan asas Polis Bantuan pada tahun lepas, universiti merancang menghantar kumpulan kedua pada tahun ini.

“Setakat ini kami telah melatih 35 orang untuk menjadi Polis Bantuan dan perancangan kami adalah semua pengawal keselamatan kami yang berjumlah 145 orang akan dilatih sebagai Polis Bantuan.

“Signifikannya perkara ini adalah, bahagian keselamatan menjadi satu bahagian keselamatan yang akan dianggotai keseluruhan Polis Bantuan dan ini memberi kami kelebihan dari sudut keselamatan di kampus,” katanya.

Beliau berkata demikian ketika ditemui pemberita selepas Majlis Penyerahan Aset Kenderaan Polis Bantuan UNIMAS yang disempurnakan oleh Pengerusi Lembaga Pengarah UNIMAS Datu Dr Hatta Solhi di UNIMAS di sini, semalam.

Menurut Kadim, 35 orang berkenaan adalah kumpulan pertama sementara kumpulan seterusnya menyusuli sehingga kesemua menjadi anggota Polis Bantuan dengan kumpulan kedua pada Julai nanti.

Beliau berkata dengan adanya aset yang diserahkan itu semalam, ia membantu Polis Bantuan atau Bahagian Keselamatan UNIMAS menjalankan tugas serta tanggungjawab menjaga keselamatan kampus agar ia menjadi kampus harmoni, selamat dan aman sejahtera.

“Sebanyak enam kenderaan dan hampir 10 motosikal lama kami gantikan dengan 15 motosikal Yamaha Lagenda, lima motosikal berkuasa tinggi Kawasaki Ninja dan dua kereta Preve dengan kos keseluruhan lebih kurang RM600,000.

“Ini menjadikan aset Bahagian Keselamatan UNIMAS kesemuanya adalah 38 aset terdiri daripada lapan kenderaan (kereta) dengan 30 buah motosikal termasuk yang sedia ada,” katanya.

Menurut Kadim keselamatan dan keharmonian di universiti itu amat penting memandangkan ia sebuah kampus besar dengan kampus induk adalah seluas 2,000 ekar selain kampus kecil di Bau, Sibu, bandar raya Kuching dan Serian.

Namun ujarnya, UNIMAS tetap bersyukur kerana keadaan keselamatan terkawal dan tidak ada kes besar berlaku cuma kes kecil seperti kesalahan melanggar lalu lintas dan kecurian telefon bimbit.

“Bagaimanapun ia adalah disebabkan kurangnya kesedaran mengenai keselamatan di kalangan pelajar, maka itu kami mahu menjadikan keselamatan sebagai budaya kepada pelajar UNIMAS.

“Kami menerapkan pencegahan dan memberi kesedaran kepada warga kampus tentang perlunya bersiap sedia dan elakkan kecuaiian dalam menjaga harta benda dalam usaha meminimumkan kejadian kecurian dan sebagainya,” tegas Kadim.